

المغرب

الحال ميسور يحمد الله
يأكل لقمة بمفروكة طول العام
وكباية شاي في الصباحية طول العام
وجقمة موية من حنفية طول العام
يكوضم السفة تحت الشفة

ويعاين فوق

ويدنقر التقول مخبول
ويتذكر ناسا بعاد وعزاز
رقاده حصير وقلبه سرير يلولي الهم
يشيل الغم

ويتذكر ناسا في الفريق ضائعين

ومحتاجين لملوة عيش
وجرعة موية عز الصيف

ناس جار الله ود عبد الله

الفي الصقيعة بعيش

ناس التومة بت أحمد

أم ميمونة بت الزين

ست بنات الفجة والحلال

التكرم الضيف تستر الحال

وست البسيمة الحلوة

الزي ضي البريق الشال

وكتين يضم الليل

الخشيم وديعة الخالة بنت أحمد

منضومة في معلاق

تحت عنقور سدر مسنود

يطول الهم ويتذكر

ناس السرة بنت الجاك

التشيل من داك تجيب لى دا

وتشيل من دا وتسوق لى داك

حسين يشهق ويتهد

ما همومه كتيرة فايئا الحد

وزادت جد

دا ما انفتحو مليون قد

ومليون فجوة ما بتسد

ضريبتو كبيرة دا موظف ومو مجهول

وتجديد جوازه الحال عليه الحول

كلام يزيد الهم يفوت القول

ستة ألف ريال ضريبة هم

ضريبة ذكرى وضريبة دم

ضريبة شوق ومشوارا طويل مكتوب

عليه الشوك وتحتة الشوك مولع نار تحرق الجوف

وزي ماتشوف

حسين موجوع ملاه الخوف

من المجهول ومن القول

حسين يايمة ود التابة "

حسين يايمة خدمتو خرابة

حولين ولا مليم

ولا بيتا يغطي يتامى

ولا راكوبة بي شكابة

غربتو تطير وخدمتو تطير

" دا الراجيه سف ترابة

يطول الهم ويتذكر

القدلة في الحاحاية والقضية

والتبروقة في العصرية
وفي المرواح بقرته تقيف وعجلته تقيف
وأمو تقول أقرن العجلة يا ولدي
لبننا قليل وما بكفي
أخيائك بدوروا الشاي
والمبروك أبوك في الوادي
بصل جيعان و متحسس

يطول الهم ويتذكر
غنم ود جبرة والكتلة
وحريقة الحلة في الغفلة
يوم الهبوب والغيمة
ويوم حاج موسى ود عوض الله
طفش ومن الفريق انسل
بس تعال يا حسين
أرجع للعقب واد لي
وتعال يا حسين نحوم وسط الفريق نتسلي
أخير لينا ليم الأهل من التصنع برة